

# Allam Wanita

## Keistimewaan Wanita-wanita Islam di India

oleh Nurul Anuar

(dari Persatuan Pelajar-pelajar Melayu di India)

Penganut agama Islam di India yang seramai lebih dari 40 juta itu sungguh pun bilangan mereka kecil kalau dibandingkan dengan rakyat India semuanya kira-kira 400 juta lebih kurang itu, akan tetapi keadaan mereka tidaklah ketinggalan di dalam apa lapangan jua pun di merata-rata bandar baik pun kecil mahupun besar. Di sana tersergamalah rumah-rumah bangunan yang besar, kedai-kedai besar yang dipunyai oleh orang Islam. Perniagaan mereka sangat maju berbandingan dengan pekedai-pekedai orang yang bukan Islam. Mereka banyak yang kaya raya mempunyai kereta-kereta besar dan ladang-ladang gandum, padi, kopi dan sebagainya.

Darjah hidup mereka jauh lebih tinggi kalau dibandingkan dengan kehidupan orang-orang Islam kita di sini; ekonomi di India ini banyak dipegang oleh orang-orang Islam, begitu juga dengan lapangan siasah negeri. Dengan sebab tingginya perekonomian mereka sehingga mereka sanggup mendirikan madrasah-madrasah dan kolej-kolej, bahkan ada yang didirikan oleh seorang. Ada juga yang mendirikan universiti. Kolej-kolej tadi dan bangunan musafir *Khānah* ditanggung oleh kutipan derma daripada orang-orang kaya dan orang-orang dermawan. Mereka tidak berkehendak meminta bantuan kepada kerajaan.

Banyak anak-anak mereka yang berkelulusan tinggi dengan B. A. M. S. C. *Engineer*, L. L. B. N. Doktor dari segala jurusan dan sebagainya, tak payah saya menyebutkannya. Kebanyakannya baik lelaki mahupun perempuan adalah dengan perbelanjaan sendiri, pendek kata apa yang diperbuat oleh orang yang bukan Islam, maka orang-orang Islam dapat pula membuatnya. Dengan lain-lain perkataan kedudukan orang-orang Islam di India di setengah-setengah tempat samalah kalau dibandingkan dengan kedudukan orang-orang Cina di tanah air kita ini. Kebanyakan orang Islam di India hidup dengan bermiaga.

### Kaum Ibu Islam

Kaum-kaum ibu Islam pula jauh bezanya dengan keadaan kaum-kaum ibu di tempat lain. Di samping mereka patuh dan taat kepada perintah-perintah agama yang maha suci, mereka juga masih mendokong adat resam bangsanya yang telah turun-temurun. Dalam perhiasannya sebahagian mereka memakai gelang kaki.


Mereka tersekut dan tidak mendapat kebebasan seperti perempuan lain. Ini dapat dilihat daripada gerak-geri dan pergaulan mereka sehari-hari. Mereka dipandang hina kalau mereka berjalan tidak bersama-sama mahramnya, dan berjalan mestilah memakai purdah (tutup muka). Apabila kita berjalan di kedai-kedai di bandar-bandar sama ada besar atau pun kecil, dengan senang kita dapat bezakan yang mana Islam dan yang mana Hindu. Perempuan Islam kebanyakannya memakai purdah. Kalau dipandang sekali imbas tidak dapat kita memperbezakan yang mana dara, yang mana janda dan yang mana sudah bersuami, cuma corak pakaian mereka ada perbezaan sedikit. Kalau yang mudanya selalu memakai purdah yang berwarna dan hitam, tetapi yang tua-tuanya hanya memakai serba putih sahaja.

ini tidaklah tertentu sewaktu berjalan-jalan di tempat-tempat lapang sahaja, tetapi mereka tetap dengan keadaan itu walaupun dalam kereta (motokar).

Seperkara yang menarik perhatian kita di setengah-setengah tempat iaitu kebanyakan di kedai-kedai minum pun kaum lelaki adalah berasingan tempat dengan kaum wanita – ini bukanlah tertentu kepada perempuan-perempuan Islam sahaja bahkan perempuan-perempuan Hindu pun demikian halnya; bahkan di setengah-setengah daerah, sehingga dalam bas, panggung wayang pun kaum ibu diasangkan. Bagaimanakah kaum-kaum ibu kita hari ini, adakah berasingan tempat dengan kaum lelaki sewaktu dalam kenderaan, atau di kedai-kedai kopi lebih-lebih lagi di panggung wayang? Memang jauh bezanya kalau hendak dibandingkan dengan di India sekalipun pemerintahannya Hindu!

Perempuan-perempuan Islam di India jauh lebih tinggi

kedudukannya dari di negeri-negeri lain, baik di segi kesopanan mahupun di segi keistimewaan yang ada pada mereka. Mereka tidak diperlukan untuk bekerja seperti kaum ibu kita di Tanah Melayu, kerana kebanyakan kaum Islam suka memakai orang gaji, sehinggakan tukang masaknya pun orang gaji juga. Kaum ibunya baik dara atau sudah bersuami tidaklah baik dara atau sudah bersuami kaum-kaum ibu kita di Malaya setengah-setengahnya turut sama ke sawah atau ke dalam hutan mana yang diam di kampung, dan di bandar-bandar pula turut sama ke pasar dan ke kedai-kedai untuk membeli keperluan dapur dan sebagainya. Ini adalah disebabkan keadaan memaksa kita berbuat demikian, kerana kedudukan



*Pelajar-pelajar wanita kelas dewasa Kampung Sungai Hanching, Batu 3 Jalan Muara, Brunei. Duduk nomor 9 dari kanan ialah guru mengaji Qur'an bagi gadis-gadis kampung itu (isteri Cikgu Ilyas), manakala yang berbaju hitam ialah isteri Tuan Imam Haji Abdul Rahman*

ekonomi bangsa kita Melayu jauh lebih rendah daripada yang lain-lainnya. Adapun di India mereka sanggup mengurung perempuan-perempuan mereka dan tidak diberi sebarang pekerjaan kerana pihak kaum lelakilah yang selalu bekerja keras, rajin berusaha dalam serba lapangan sehingga tidak kan<sup>1</sup> lagi bantuan-bantuan dari pihak kaum perempuan.

Payah kita hendak melihat perempuan-perempuan Islam, kalau pun dapat hanyalah nampak pakaian sahaja. Keadaan yang seperti ini memang sesuai dengan ajaran agama kita yang maha suci. Islam tidak melarang anak-anak perempuan untuk belajar walau setinggi mana sekalipun ilmu yang

dipelajarinya selama tidak melampaui had dan garisan-garisan yang telah ditentukan oleh Islam. Bahkan Islam menggalakkan supaya anak-anak lelaki dan perempuan mempelajari hakikat-hakikat Islam dengan sedalam-dalamnya, dan mempelajari juga ilmu dunia. Ada pula cara orang-orang Barat dan orang-orang yang bukan Islam mendidik anak-anak perempuan mereka dengan bercampur gaul dengan tidak diberi sekatan itu adalah sangat-sangat bertentangan dengan ajaran Islam. Bagaimana yang dapat kita saksikan hari ini di mana-mana negeri yang telah mencapai kemajuan atau negeri-negeri yang pernah dijajah oleh bangsa-bangsa Barat, mereka adalah memberikan hak kebebasan



*Islam telah berkembang dan tersiar di Borneo Utara semenjak lima ratus tahun yang lalu. Gambar menunjukkan perempuan-perempuan Islam dari suku Bajau (orang Dusun) sedang berniaga di pasar terbuka – Borneo Utara.*

<sup>1</sup> tulisan dalam teks asal tidak dapat dibaca

yang penuh kepada anak-anak perempuan mereka bergandingan bahu dengan anak lelaki. Kalau orang-orang Islam menurut seperti itu apakah kemajuan yang boleh kita banggakan? Nabi kita dizahirkan adalah untuk menyempurnakan akhlak, akhlak manusia di muka bumi ini.

Tetapi kita dari sehari ke sehari semakin jauh lari daripada ajaran-ajaran agama kita Islam yang maha agung<sup>2</sup> itu. Bagi kita yang baharu mencapai kemerdekaan, ingin berdiri sama tinggi duduk sama rendah dengan bangsa-bangsa lain di dunia ini, adakah kita mesti tinggalkan atau lupakan keistimewaan-keistimewaan yang ada pada kita sendiri?

### Pakaian Kebangsaan

Memangnya wanita India masyhur dengan sarinya dan wanita Cina dengan ceongsamnya, orang-orang Barat dengan gaunnya; sedangkan kita bangsa Melayu telah sedia ada pakaian istimewa bagi wanita-wanitanya seperti baju kebaya dan berkain batik atau berbaju kurung dan sebagainya. Kalau kita ingin bergandingan bahu dengan bangsa-bangsa lain adakah maksudnya kita mesti tiru mereka? Sepatutnya bagi kita umat Melayu atau umat Islam khasnya terutama bagi kaum-kaum wanita, dikehendaki lebih-lebih berusaha mengembangkan dan membiasakan bagi bangsa kita pakaian Melayu kerana memang bersesuaian bagi kita dan negeri kita serta agama Islam kita.

Bangsa kita mudah sekali terpengaruh oleh sebarang perubahan yang mendatang, sehingga apa yang baharu semuanya<sup>3</sup> dianggap baik belaka. Ada pun wanita-wanita India mereka tetap dengan sarinya dan sejenis lagi baju.

punjabi. Begitu pula perempuan-perempuan Cina, tetap memelihara ....<sup>4</sup> resam kebangsaan mereka turun-temurun.

Kita tidak harus mencontohi perempuan-perempuan Turki atau Mesir hari ini, sekalipun kedua-duanya negara-negara Islam yang telah mencapai kemajuan yang tinggi, sehingga telah dapat menyamai dengan negeri-negeri Barat. Kita telah sedia ada kebudayaan dan adat resam sendiri yang setengahnya sesuai dengan kehendak-kehendak Islam, maka yang seumpama itu tidaklah mesti diubah dan ditukar ganti lagi. Dalam pada itu, mana kebudayaan dan adat resam yang sungguhpun sudah turun-temurun kita pusakai, tetapi menyalahi dengan kehendak-kehendak agama kita Islam, maka inilah yang perlu kita buang dan ganti dengan apa juar cara yang diluluskan oleh Islam.

Khusyukkah sembahyang tuan?

“Dalam kita sujud dalam kita meletakkan dahi di bumi, rasakanlah akan kehinaan diri bahawa kita ini berasal dari setitik air yang hanyir dan akan kembali menjadi bangkai yang busuk yang tidak ada harganya” – kata Kiayi Muhammad Hasbi al-Šiddīqī. Kita manusia tidak ada kekuatan dan tidak ada harga, kerana itu latihlah diri supaya khusuk di dalam sembahyang. Salah satu caranya bacalah ucapan Kiayi Muhammad Hasbi.

**Sujudlah kepada Tuhanmu!**

Disusun oleh Edrus

Sebuah buku *serial* syarahan 2 yang diterbitkan oleh **Qalam**. Senaskhah hanya 40 sen sahaja. Ukuran kecil.

<sup>2</sup> Dalam teks asal ditulis ‘akung’ (kesilapan ejaan)

<sup>3</sup> perkataan dalam teks asal tidak jelas

<sup>4</sup> perkataan tidak dapat dibaca